

LIGJ
Nr. 114/2020

PËR DISA NDRYSHIME DHE SHTESA NË LIGJIN NR. 45, DATË 30.4.2015 “PËR TË DREJTËN E INFORMIMIT PËR DOKUMENTET E ISH-SIGURIMIT TË SHQIPËRISË TË REPUBLIKËS POPULLORE SOCIALISTE TË SHQIPËRISË”

Në mbështetje të neneve 81 dhe 83, pika 1, të Kushtetutës, me propozimin e një grupi deputetësh,

KUVENDI
I REPUBLIKËS SË SHQIPËRISË

VENDOSI:

Në ligjin nr. 45, datë 30.4.2015 “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë” bëhen këto ndryshime dhe shtesa:

Neni 1

Në nenin 2, pika 1 ndryshohet si më poshtë:

“1. Ky ligj zbatohet për dokumentet e ish-Sigurimit të Shtetit të Ministrisë së Punëve të Brendshme të Republikës Popullore Socialiste të Shqipërisë për periudhën 29 nëntor 1944 deri në ditën e krijimit të Shërbimit Informativ Kombëtar, 2 korrik 1991, të cilat disponohen nga të gjitha arkivat e rrjetit arkivor të Republikës së Shqipërisë dhe që lidhen me veprat penale politike të parashikuara në ligjin nr. 7514, datë 30.9.1991, “Për pafajësinë, amnistinë dhe rehabilitimin e ish-të dënuarve dhe të përndjekurve politikë”, të ndryshuar, pavarësisht nëse është dhënë ose jo një dënim për këto vepra nga organet kompetente të regjimit komunist.”.

Neni 2

Në nenin 3 bëhen ndryshimet e mëposhtme:

1. Pika 2 ndryshohet si më poshtë:

“Autoriteti” është Autoriteti për Informimin mbi dokumentet e ish-Sigurimit të Shtetit, organ kolegjal me kompetencat dhe përgjegjësitë sipas përcaktimeve të këtij ligji dhe që organizohet e funksionon sipas parashikimeve të këtij ligji dhe Rregullores për Organizimin dhe Funksionimin e Autoritetit.

2. Pika 4 ndryshohet si më poshtë:

“Bashkëpunëtor i ish-Sigurimit të Shtetit” është çdo person që vërtetohet se ka bashkëpunuar në mënyrë të fshehtë me organet e ish-Sigurimit të Shtetit, në veprimtari të karakterit politik, që lidhen me veprat penale politike të parashikuara në ligjin nr.7514, datë 30.9.1991, “Për pafajësinë, amnistinë dhe rehabilitimin e ish-të dënuarve dhe të përndjekurve politikë”, të ndryshuar, pavarësisht nëse është dhënë ose jo një dënim për këto vepra nga organet kompetente të regjimit komunist, për të cilët disponohen dosje, kartela ose regjistrime në indekset e kartotekave të ish-Sigurimit të Shtetit.”.

3.Pas pikës 4 shtohet pika 4/1 me këtë përmbajtje:

“Anëtarë të ish-Sigurimit të Shtetit” janë punonjësit që kanë qenë në marrëdhënie pune, të cilët kanë pasur funksione zyrtare në strukturat e ish-Sigurimit të Shtetit, ku përfshihen: oficer, nënoficer, nëpunës, punonjës operativ deri te punonjësi i nivelit të lartë drejtues i ish-Sigurimit të Shtetit.”.

4. Pika 8 ndryshohet si më poshtë:

“Person i zhdukur”, sipas fushës së veprimit të këtij ligji, është personi i arrestuar, i burgosur, i rrëmbyer ose të cilit i është hequr liria në çdo formë tjetër nga agjentë të shtetit apo nga persona të tjerë a grupe personash, që kanë vepruar me autorizimin, mbështetjen ose miratimin e shtetit, pasuar nga mohimi i pranimin të heqjes së lirisë ose nga fshehja e fatit të personit të zhdukur a e vendit ku gjendet ai, duke e shkëputur nga mbrojtja e ligjit.”.

Neni 3

Pas nenit 9 shtohet neni 9/1 me këtë përmbajtje:

“Neni 9/1

Kompetencat e Kryetarit

Kryetari ka këto kompetenca:

- a) vendos për rendin e ditës, thërret dhe drejton mbledhjet e Autoritetit;
- b) ndjek zbatimin e këtij ligji dhe akteve nënligjore në zbatim të tij;
- c) kujdeset për zbardhjen, publikimin, si dhe zbatimin e vendimeve të Autoritetit;
- ç) përfaqëson Autoritetin në marrëdhënie me të tretët;
- d) drejton administratën e Autoritetit dhe kujdeset për mbarëvajtjen e veprimtarisë së mbledhjeve të Autoritetit duke siguruar edhe dokumentimin e tyre, ndërmjet të tjerave me anë të regjistrimit audio;
- dh) kujdeset për publikimin e veprimtarisë së institucionit në faqen zyrtare apo mjete të tjera komunikimi me publikun;
- e) siguron bashkëpunimin institucional të Autoritetit me institucionet vendase dhe të huaja, si dhe në projekte, nisma rajonale, ndërkombëtare, në përputhje me qëllimin e veprimtarisë së Autoritetit;
- ë) kryeson grupet e punës për nevoja të ndryshme të Autoritetit, në zbatim të parashikimeve të këtij ligji;
- f) propozon kërkesat e Autoritetit për nevoja buxhetore dhe personel apo ndryshime legjislative në organet përkatëse sipas legjislacionit në fuqi.
- g) në ushtrim të kompetencave të veta nxjerr urdhra në përputhje me këtë ligj dhe legjislacionin në fuqi.

Neni 4

Pas nenit 22 shtohet neni 22/1 me këtë përmbajtje:

“Neni 22/1

Bashkëpunimi për identifikimin dhe rikuperimin e trupave të të zhdukurve dhe të të ekzekutuarve, si dhe masat për ruajtjen e vendvarrimeve

1. Autoriteti bashkëpunon me institucionet shtetërore qendrore dhe vendore për procesin e identifikimit dhe rikuperimit të trupave të atyre që u zhdukën ose u ekzekutuan gjatë komunizmit, si

dhe për marrjen e masave për të mbrojtur dhe ruajtur në mënyrën më të përshtatshme vendet që janë aktualisht apo do të identifikohen si vendvarrime.

2. Rregullat e bashkëpunimit ndërmjet Autoritetit dhe institucioneve qendrore dhe vendore për identifikimin dhe rikuperimin e trupave të zhdukur gjatë komunizmit parashikohen në marrëveshje dy apo shumëpalëshe të lidhura për këtë qëllim.

3. Autoritetet përgjegjëse dhe mënyra e mbrojtjes dhe ruajtjes së vendvarrimeve të identifikuar ose të dyshuara përcaktohen me vendim të Këshillit të Ministrave.

Neni 5

Në nenin 27 bëhen këto ndryshime:

1. Në pikën 1, shkronja “d”, fjalët “sipas nenit 30” zëvendësohen me fjalët “sipas nenit 29”.

2. Pika 2 ndryshohet si më poshtë:

“Autoriteti vë në dispozicion dokumentacionin dhe lejon përdorimin e dokumenteve, për qëllime të verifikimit të parashikuar nga shkronja “d” e pikës 1 të këtij neni.”

Neni 6

Në nenin 28, pika 2 ndryshohet si më poshtë:

“Autoriteti vë në dispozicion dokumentacionin dhe lejon përdorimin e dokumenteve për qëllime të verifikimit të parashikuar nga shkronja “d” e pikës 1 të këtij neni.”.

Neni 7

Në nenin 29 bëhen ndryshimet e mëposhtme:

1. Pika 2 ndryshohet si më poshtë:

“2. Autoriteti u përgjigjet institucioneve kushtetuese dhe autoriteteve publike për zyrтарin që emërohet ose ngrihet në detyrë, për periudhën e përcaktuar në nenin 2 të këtij ligji, përkatësisht nëse:

a) ka qenë ose jo person në ndjekje për spiunazh apo terrorizëm;

b) ka qenë ose jo anëtar, bashkëpunëtor, i favorizuar i ish-Sigurimit të Shtetit, sipas përcaktimeve të këtij ligji;

c) figuron ose jo në dokumente të ish -Sigurimit të Shtetit.”.

2. Pika 4 ndryshohet si më poshtë:

“4. Autoriteti nuk administron kërkesat për informacion për zyrtarët që propozohen të emërohen ose ngrihen në detyrë në institucionet kushtetuese dhe autoritetet publike, kur Autoriteti administron apo i janë vënë në dispozicion dokumenti autentik origjinal i certifikatës së pastërtisë së figurës, shoqëruar me vendimin përkatës nga institucionet përgjegjëse, sipas ligjit nr. 8001, datë 22.9.1995, “Për gjenocidin dhe krimet kundër njerëzimit kryer në Shqipëri gjatë sundimit komunist për motive politike, ideologjike dhe fetare”, si dhe ligjit nr. 8043, datë 30.11.1995, “Për kontrollin e figurës së zyrtarëve dhe personave të tjerë që lidhen me mbrojtjen e shtetit demokratik”, i ndryshuar.”.

Neni 8

Në nenin 36 shtohen pikat 5 dhe 6 me këtë përmbajtje:

“5. Në funksion të edukimit qytetar, me qëllim informimin e qytetarëve për dokumentet dhe veprimtarinë e ish-Sigurimit të Shtetit në tërësi, dhe me fokus brezat e rinj në veçanti, Autoriteti

zhvillon veprimtari që ndihmojnë në formësimin e vetëdijes civile për rindërtimin e narrativës të së shkuarës komuniste, të mbështetur mbi kërkimin shkencor, brenda fushës së veprimit të këtij ligji.

6. Autoriteti për realizimin e veprimtarisë sipas këtij ligji, ka të drejtë të përzgjedhë dhe të kontraktojë ekspertë të jashtëm. Pagesa e ekspertëve të jashtëm përcaktohet sipas akteve nënligjore në fuqi.”.

Neni 9

Nxjerrja e akteve nënligjore

Ngarkohet Këshilli i Ministrave për nxjerrjen e aktit nënligjor sipas nenit 22/1 të ligjit brenda katër muajve nga hyrja në fuqi e këtij ligji.

Neni 10

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

KRYETAR
Gramoz Ruçi

Miratuar në datën 29.7.2020.